

## 2 Jon

### Okoro buk nukan onoktapau

Jon ko ätäi keser jer wewon, “Is akan kamwariäim ro näwäus kiro jer kar asir näwäu kon mokoit pak jer we marom.” Karauk roat akan ronkat kesek oin, ‘Jon ko kiro jer kar asir kon mokoit pak jer we marau wa ko totok ämän mowon. Ko Kristen roasiret kar mena rai pak akan kamwariäu ro mesin pak totok ämän mowon.’

Jon nukas roasiret akan woiaka epar moin ak karauk roasiret akanun woiakas meiäun rai awarowon. Ak sät ämän areäi roat akan ämän wa rowau rai awarowon.

<sup>1</sup> O asir, Anut nukas na nan mokoit pak nukan senes sare musowon, is, Jon, akan kamwareäim ro, okon, is ak okoro jer we marom. Isan woias ak mesin meie rau, isas karar wa, kiro roat ak epar ämän äpu, akas ran akanun woiakas meie rai. <sup>2</sup> Owon, kiro epar ämän iken woiok uru rau, kiro orip orip iken woiok uru rawai.

<sup>3</sup> Momonek Anut, kon mokoi Jisas Kraiss pak awan woiawas ikenun meieanik, au epar ikenun woiakati momoi, awan ronkatis ik erar sareikoirin, keseria, iken woiok päurar rawai.

*Ik erekapu jaunokot akanun woiakas meiäun onok tainorau.*

<sup>4</sup> Karauk roat akas nan karauk mokoit epar ämän tainorin airoin roumoi, is nepipirim. Kiro onok momonok nukasar tainorwe aikowon

senek keseriäi. <sup>5</sup> O asir, kiro onokun, is na aisom, ik erekapu jaunokot mesin iken woiokos meiäü. Okoro sintore ämän rusapai na jer we musom kiro awau ämän wa, kiro sintore ämän meteran. <sup>6</sup> Jaunokot akanun woiakas meiäun onok kesek: Ik Anut nukan sintore ämän jekur tainoriäüm. Ak meter Jisas mesin woiaka epar moin opok, ak kiro kon sintore ämän keser roin, ak jaunokot akanun woiakas meiewe, ak kiro onok tainorwe.

*Ik Krai nukan ämän sakau atau.*

<sup>7</sup> Roat sosop okoro omnokou opok ämän sätäikaun arirai. Akas äiäi, “Jisas Krai ko ro senek kowau wa.” Keser äiena rai, kiro roat ak sätäiäi roat. Ak Jisas Krai nukan iwäi jaukut. <sup>8</sup> Ak jekur aparwe, ak kiro osap eposek owaun sarau sakau morai wa utaei. Ak jekur aparna rai, Näwäu nukas ak osap eposek araun sare marowon kiro erekapu arai. <sup>9</sup> Utianik, kar ro ko pote kar ämän atap oianik, Krai nukan tamareäwon ämän jekur sakau atau wa, Anut kiro ro pak pasar rawau wa. Utianik, inok ro ko Jisas Krai nukan tamareäwon ämän sakau ate raiäü ro, momomok nuka kon mokoi pak au kiro ro pak pasar raiäir. <sup>10</sup> Utianik, kar ro kiro epar ämän ak opok wa oi potonuk rai, akas kiro ro ‘pere’ rai wa aurau, akas ko akan owa wa imäi tonau. <sup>11</sup> Inok ros kiro ro ‘pere’ aurai, kiro kon jauk saremoi, kon sarau aru isanarai.

*Jer pataraun ämän.*

<sup>12</sup> Is ämän sosop rau ak awaraun itok, utianik, is kiro ämän erekapu jer wäu utom. Utianik, is

ak rawa pote apwaroita, ik erek tanerai aräu,  
keseria, iken woiook näwäu ererai.

<sup>13</sup> Akan äpinaka Anut nukas sare mowon,  
nukan mokoit akas na 'pere' aiso.

**Anut nukan Ämän Eposek  
New Testament in Girawa**

copyright © 2013 Wycliffe Bible Translators, Inc.

Language: Girawa

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 21 Feb 2024 from source  
files dated 29 Jan 2022

79f715b0-a1c7-58ec-85a5-b96f2ba338fd